

(钦定)平定七省方略

北京中国书店印行



欽定平定陝甘新疆回匪方略卷三百十三 庚辰年至辛巳年

六年正月初三日 辛未 親郡王御前大臣軍機大

臣總理各國事務衙門王大臣大學士六部都

察院堂官奏言 臣等欽奉

慈安端裕康慶昭和莊敬皇太后

慈禧端佑康頤昭豫莊誠皇太后懿旨將崇厚所議條

約章程妥議具奏伏查崇厚所議約章內界務一節

總理各國事務衙門疊次具奏均聲明有礙全
局自是不能照議償款一節係歸還俄國代收
代守伊犁兵費並補卹在中國境內被搶受虧
俄商及被害俄民家屬等款俄國如允還伊犁
全境似可照辦商務一節有循照舊約者有仿
照各國總例者皆俄國與各國約章所已行此
外如設領事開行棧等款輻輳甚多流弊滋大

且礦華商生計均請獎辦並議臣等再四熟商
此次崇厚本在俄京與其外部定議現既不能
照議可否另行遣使前往將崇厚所定約章專
條如何違

訓越權不能議准緣由斟酌情理與俄國君臣剴切
商辦伏候

訓示遵行

同日醇親王奏言欽奉

慈安端裕康慶昭和莊敬皇太后

慈禧端佑康頤昭豫莊誠皇太后懿旨崇厚所議條約

章程醇親王著一併會議具奏等因欽此

臣

遵卽先

後赴內閣及總理各國事務衙門會同王大臣
等將各摺片詳細披閱公同商酌意見相同除
由王大臣等合詞具奏外理合恭摺覆陳伏乞

皇太后聖鑒均奏入

欽奉

慈安端裕康慶昭和莊敬皇太后

慈禧端佑康頤昭豫莊誠皇太后懿旨前有旨將大學

士六部九卿翰詹科道所奏遵議崇厚所議條約章程等件一併交親郡王御前大臣軍機大臣總理各國事務衙門王大臣大學士六部都察院堂官再行

詳細妥議並令醇親王一併會議茲據王大臣等會議具奏並據醇親王另摺奏意見相同此次崇厚奉命出使所議條約章程等件有違訓越權之處事多窒礙著派一等毅勇侯大理寺少卿曾紀澤前往將應議事件再行商辦以期妥協而重邦交

同日刑部奏言欽奉

上諭崇厚奉命出使並不聽候諭旨擅自起程回京

情節甚重僅予革職不足蔽辜著先行革職拏問
交刑部治罪欽此旋經該旗將崇厚送部臣等當
卽派員審問據該革員供稱向來

欽差在外辦事畢一面拜發摺件一面起程回京伊
誤會向章遂於拜摺後卽行奏報起程等語竊
思崇厚以大員奉

命出使辦理要件宜如何敬謹將事候

旨遵行乃竟擅自回京洵屬情節甚重誠如

聖諭僅予革職不足蔽辜惟徧查律例並無恰合治
罪專條查咸豐八年耆英一案亦係不候

諭旨擅自回京欽奉

特旨派王大臣會同問擬具奏在案今崇厚係大員

奉

旨交臣部
非律例既無專條自應奏請

欽派王大臣會同 臣部詳細定擬奏入

上諭內閣曰前因崇厚不候諭旨擅自回京當經革職拏問交部治罪茲據刑部奏該革員案情重大請派王大臣會同辦理本日並據會議王大臣等聯銜覆奏各一摺崇厚奉命出使於辦理事件違訓越權情節重大所有該革員應得罪名著親郡王御前大臣軍機大臣總理各國事務衙門王大

臣大學士六部都察院堂官會同定擬具奏

二十三日辛卯親郡王御前大臣軍機大臣總理

各國事務衙門王大臣大學士六部都察院堂

官奏言臣等欽奉

諭旨會議崇厚應得罪名竊思該革員奉

命出使與俄人申明舊約其交割伊犁則邊疆要區

所繫其通商陸路亦腹地大局所關業蒙

訓諭周詳自宜敬謹遵循期臻妥協以冀仰慰

宸廑乃崇厚不力持定見草率定約致諸多窒礙難
行復不恭候

諭旨擅自起程回京實屬辜負委任誠如

聖諭僅予革職不足蔽辜查崇厚條奏各款於舊章
多所增加舊章均係

欽定通行與

制書無異崇厚擅自增加應與增減

制書同科該革員已於約章內蓋印畫押卽與已施

行相同臣等公同酌議刑律既有斷罪無正條

比附定擬之文似應比律問擬以爲臣下冒昧
從事者戒崇厚應比依

制書增減已施行者斬監候律擬斬監候秋後處決
係大員恭候

欽定奏入

欽奉

慈安端裕康慶昭和莊敬皇太后

慈禧端佑康頤昭豫莊誠皇太后懿旨禮親王世鐸等
奏會議已革都察院左都御史崇厚罪名比律定擬
斬監候一摺著照所議辦理

三月二十七日
甲午金順奏言據提督曹正興稟

稱正月二十四日探悉伊犁竄出陝回百數十
騎在南山塔布喀浪古地方盤踞分兩股出竄
當卽帶隊往庫森木吉迎剿並派總兵耿仕才
帶隊往登樓寺口迎剿二十五日率隊至烏喇
烏蘇達坂見有賊騎當卽開槍迎擊賊騎敗退
至塔布喀浪古山溝壘木爲柵拒守隘口守備
萬玉林等身先士卒奮勇奪柵賊衆狂奔殲斃

四十餘名追入雪山峯峻雪深墮崖死者十餘
名奪獲牛馬駝隻百餘匹是晚耿仕才旋營據
稱追賊進登樓寺口至紅山背賊據山巔我軍
仰擊賊以巨石下擲我軍下馬覓徑潛襲其後
賊驚顧奔潰率隊窮追至俄卡附近之六道橋
子賊已過卡等因臣接閱之下飛飭前敵各營
加意嚴防無任一騎東竄以固邊圉奏入得